

» civitates Judææ<sup>1</sup>. » Ipsæ sunt Ecclesiæ. Nemo dicat : Quando erit istud ut ædificantur civitates Judææ? O si velis agnoscere structuram , et esse lapis vivus , ut intres in eam ! Et nunc civitates Judææ ædificantur. Judaenim confessio interpretatur. De confessione humilitatis ædificantur civitates Judææ : ut foris ab eis superbi remaneant , qui confiteri erubescunt. « Quoniam Deus salvam faciet Sion. » Quam Sion ? Audi in sequentibus : « Et semen servorum ejus obtinebunt eam , et qui diligunt nomen ejus inhabebunt in ea<sup>2</sup>. »

**XXI.** Psalmus finitus est , sed paululum istos duos versus non relinquamus : admonent enim nos aliquid , ne desperando in illam structuram non intremus. « Semen , » inquit , servorum ejus obtinebunt eam. » Jam ergo « Semen servorum ejus » qui sunt ? Forte dicas , Judæi nati de Abraham : nos autem qui non sumus nati de Abraham , quomodo habebimus istam civitatem ? Sed non sunt semen Abrahæ illi Judæi , quibus dictum est : « Si filii Abrahæ estis , facta Abrahæ facite<sup>3</sup>. Semen ergo servorum ejus , imitatores fidei servorum ejus obtinebunt eam. » Denique ultimus versus superiorem exponit. Quasi enim turbatus , ne putares forte hoc de Judæis dici : « Et semen servorum ejus obtinebunt eam , » dicens : Nos semen gentium sumus , quæ idola coluerunt , et dæmonibus servierunt : quid ergo nobis in hac civitate sperandum est ? statim subjicit ut præsumas et speres : « Et qui diligunt nomen ejus , inhabitabunt in ea. » Hoc est enim « Semen servorum ejus , qui diligunt nomen ejus. » Quia enim servi ejus dilexerunt nomen ejus ; quicumque non diligunt nomen ejus , se dicant semen servorum ejus ; et qui non diligunt nomen ejus , non se negent semen servorum ejus.

<sup>1</sup> Psal. LXVIII, 36. — <sup>2</sup> Ibid. 37. — <sup>3</sup> Joan. VIII, 39.

---

## ENARRATIO

### IN PSALMUM LXIX.

#### Sermo<sup>1</sup>.

I. GRATIAS grano tritici<sup>2</sup> , quia mori voluit et multiplicari<sup>3</sup> : gratias unico Filio Dei Domino et Salvatori nostro Iesu Christo , qui mortem nostram subire non dedignatus est , ut nos vita sua dignos ficeret. Ecce qui singularis erat donec transiret , sicut dixit in Psalmo : « Singularis ego sum donec transeam<sup>4</sup> : » quia sic erat singulare granum , ut in se haberet magnam multitudinis fecunditatem ; in quantis granis passionem ejus imitantibus exultamus , quando natalitia Martyrum celebramus ? Multa ergo membra ejus sub uno capite ipso Salvatore nostro charitatis et pacis vinculo colligata , sicut nosse dignamini , quoniam sœpissime audistis , unus homo sunt : et ipsorum ut unius hominis vox plerumque in Psalmis auditur , et sic clamat unus tanquam omnes , quia omnes in uno unus sunt. Audiamus ergo quoniam laboraverunt Martyres , et inter magnas tempestates odiorum in hoc sæculo periclitati sunt , non tam corpore , quod quandoque posituri erant , sed ipsa fide ; ne deficientes et forte acerbis persecutionum cedentes doloribus vel amori vitæ hujus , amitterent quod promiserat Deus : qui non solum verbo , sed etiam exemplo abstulerat omnem timorem ; verbo , dicens , « Nolite timere eos qui corpus occidunt , animam autem

<sup>1</sup> Sermo iste in Martyrum solemnitate habitus est. — <sup>2</sup> Vide D. Guillon , tom. xx , pag. 542-550. — <sup>3</sup> Joan. XII, 25. — <sup>4</sup> Psal. CXL, 10.

» non possunt occidere<sup>1</sup>; » exemplo , faciens quod verbo præcepit, ut nec eorum verberantium manus vellet devitare, nec alapas percutientium, nec salivas conspuentium, nec coronam de spinis imponentium , nec crucem interficiunt : nihil horum vitare voluit , cui nihil opus erat , propter eos quibus hoc opus erat ; faciens ægrotis de se ipso medicamentum. Laboraverunt ergo Martyres : et nisi ille semper adesset qui ait : « Ecce ego vobiscum sum » usque ad consummationem sæculi<sup>2</sup>, » utique defecissent.

II. Est ergo in hoc Psalmo vox contribulatorum , et ideo utique Martyrum inter passiones periclitantium , sed de suo capite præsumendum. Audiamus eos , et loquamur cum eis ex affectu cordis , etiamsi non similitudine passionis. Illi enim jam coronati sunt , nos adhuc periclitamur : non quia tales nos persecutio[n]es urgent , quales ipsos urserunt , sed fortasse pejores in omnimodi generibus tantorum scandalorum. Nostra enim tempora magis abundant , illo Væ , quod clamavit Dominus? « Væ mundo ab » scandalis. Et quoniam abundavit iniquitas , refrigescet » charitas multorum<sup>3</sup>. » Neque enim et Lot ille sanctus in Sodomis ab aliquo corporalem persecutionem patiebatur<sup>4</sup> , aut dictum illi erat , ut non ibi habitaret : persecutio ejus , facta mala Sodomitarum erant. Non ergo jam Christo in coelo sedente , jam glorificato , jam subjectis cervicibus regum jugo ejus , et suppositis eorum frontibus signo ejus , jam nullo remanente qui palam Christianis audeat insultare , adhuc tamen inter organa et symphoniacos gemimus , adhuc illi inimici Martyrum , quia vocibus et ferro non possunt , eos sua luxuria persequuntur. Atque utinam Paganos tantummodo doloreremus : esset qualemcumque sola-

<sup>1</sup> Matth. x, 28. — <sup>2</sup> Id. xxviii, 20. — <sup>3</sup> Id. xviii, 7, et xxiv, 12. — <sup>4</sup> Gen. xix, 39.

tium , expectare eos quinondum cruce Christi signati sunt , quando signentur , et quando ejus auctoritate alligati desinant furere. Videmus etiam portantes in fronte signum ejus , simul in ipsa fronte portare impudentiam luxuriarum , diebusque et solemnitatibus Martyrum non exultare , sed insultare. Et inter hæc gemimus , et haec persecutio nostra est , si est in nobis charitas quæ dicat : « Quis » infirmatur , et non ego infirmor ? Quis scandalizatur , » et non ego uror<sup>1</sup>? » Nullus ergo servus Dei sine persecutione : verumque est illud Apostolus ait : « Sed et » omnes qui volunt in Christo pie vivere , persecutionem » patientur<sup>2</sup>? » Videris unde , videris quomodo , diabolus ille biformis est. Leo est in impetu , draco in insidiis. Leo minetur , inimicus est : draco insidietur , inimicus est. Quando nos securi ? Ecce fiant omnes Christiani , numquid et diabolus Christianus erit ? Tentare ergo non cessat , insidiari non cessat. Infrenatus est atque illigatus in cordibus impiorum , ne sæviat in Ecclesiam , et antum faciat quantum vult. Fremunt dentes impiorum adversus dignitatem Ecclesiæ et pacem Christianorum , et quia non habent quid agant sæviendo ; saltando , blasphemando , luxuriando , non impellunt corpora Christianorum , sed lacerant animas Christianorum. Clamemus ergo una voce omnes verba hæc : « Deus , in adjutorium meum intende<sup>3</sup>. » Opus enim habemus sempiterno adjutorio in isto sæculo. Quando autem non ! Modo tamen in tribulatione positi maxime dicamus : « Deus , in adjutorium meum intende. »

III. « Confundantur , et revereantur , qui quærunt » animam meam<sup>4</sup>. » Christus dicit : sive caput dicat , sive corpus dicat ; ille dicit , qui dixit : « Quid me persequeris<sup>5</sup>? » Ille dicit , qui dixit : « Cum uni ex minimis

<sup>1</sup> 2 Cor. xi, 29. — <sup>2</sup> 2 Tim. iii, 12. — <sup>3</sup> Psal. lxix, 2. — <sup>4</sup> Ibid. 3. — <sup>5</sup> Act. ix, 4.

» meis fecistis, mihi fecistis<sup>1</sup>. » Nota est ergo vox hujus hominis, totius hominis, capitum et corporis : non sæpe commendanda, quia nota. « Confundantur, inquit, et revereantur, qui querunt animam meam. » In alio Psalmo dicit : « Considerabam in dexteram, et videbam, et non erat qui cognosceret me : periit fuga a me, et non est qui exquirat animam meam<sup>2</sup>. » Ibi de persecutoribus ait, quia non erat qui exquireret animam ejus : hic autem, « Confundantur, et revereantur, qui querunt animam meam. » Dolebat se non queri ad imitandum : gemebat se queri ad opprimendum. Quæreris animam justi, cum imitari cogitas : quæreris animam justi, cum occidere cogitas. « Quoniam duobus modis queritur anima hominis justi, singuli in singulis Psalmis expressi sunt. Illic dolet, quia non est qui requirat animam ejus ad imitandum passiones ejus : hic autem, « Confundantur et revereantur, qui querunt animam meam. » Quærunt animam ejus, non ut duas habeant. Non enim sic quererent animam ejus, quomodo querit latro tunicam viatoris : ad hoc occidit, ut exploiet, ut habeat. Qui autem persequitur ut occidat, excludit animam, non se vestit. Quærunt illi animam meam; occidere me volunt. Quid ergo tu illis optas? « Confundantur, et revereantur. » Et ubi est quod audisti a Domino tuo: « Diligite inimicos vestros, benefacite his qui oderunt vos, et orate pro his qui persequuntur vos<sup>3</sup>? » Ecce persecutionem pateris, et maledicis eis a quibus pateris : quomodo imitaris passiones præcedentes Domini tui, pendens in cruce, et dicentis : « Pater, ignosce illis, quia nesciunt quid faciunt<sup>4</sup>? » Respondet talia dicentibus Martyr, et dicit : Dominum mihi proposuisti dicentem : « Pater, ignosce illis, quia nesciunt quid

<sup>1</sup> Matth. xxv, 40. — <sup>2</sup> Psal. cxli, 5. — <sup>3</sup> Matth. v, 44. — <sup>4</sup> Luc. xxiii, 34.

» faciunt, » agnosce et vocem meam, ut sit et tua. Quid enim dixi de inimicis meis? « Confundantur, et revereantur. » Jam facta est talis vindicta de inimicis Martyrum. Saulus ille, qui Stephanum persecutus est, confusus est et reveritus. Anhelabat cædes, quærebat quos attraheret et necaret : audita desuper voce: « Saule, Saule, quid me persequeris? » confusus et prostratus est, et erectus ad obediendum, qui inflammatus erat ad persequendum<sup>1</sup>. Hoc ergo optant Martyres inimicis suis: « Confundantur, et revereantur. » Quandiu enim non confunduntur et reverentur, necesse est facta sua defendant : gloriosi sibi videntur, quia tenent, quia ligant, quia verberant, quia occidunt, quia saltant, quia insultant : de his omnibus factis aliquando confundantur et revereantur. Si enim confundentur, et convertentur : quia converti non possunt, nisi confusi fuerint et reveriti. Optemus ergo hæc inimicis nostris; securi optemus. Ecce ego dixi, et vobis cum dixerim : omnes qui adhuc saltant et cantant et insultant Martyribus, « Confundantur, et revereantur : » aliquando in his parietibus tundant confusi pectora sua.

IV. « Avertantur retrorsum, et erubescant, qui cogitant mihi mala<sup>2</sup>. » Primo fuit impetus persequentium ; modo remansit malevolentia cogitantium. Prorsus tempora sunt in Ecclesia persecutionis distincta sequentia. Factus est impetus in Ecclesiam, quando reges persequebantur : et quia prædicti erant reges et persecuti et credituri, impleto uno, utique alterum sequebatur. Factum est et illud quod consequens fuit ; crediderunt reges, data pax est Ecclesiæ, coepit esse in culmine dignitatis Ecclesia, etiam in hac terra, etiam in hac vita : sed non deest fremitus persecutorum ; impetus suos ad cogitationes verterunt. In illis cogitationibus tanquam in abyso ligatus est dia-

<sup>1</sup> Act. vii, 57, et ix, 1-6. — <sup>2</sup> Psal. lxix, 4.

bolum : fremit , et non erumpit. Dictum est enim de his temporibus Ecclesiæ : « Peccator videbit, et irascetur. » Et quid faciet? Numquid quod primo? Attrahe, liga, persecute. Non facit hoc. Quid ergo? « Dentibus suis fren- » det, et tabescet<sup>1</sup>. » Et his tanquam irascitur **Martyr**, et tamen pro his orat **Martyr**. Quomodo enim bene optavit illis, de quibus dixit: « Confundantur, et revereantur, » qui querunt animam meam : » sic et nunc, « Avertan- » tur retrorsum , et erubescant, qui cogitant mihi mala. » Quare? Ut non præcedant, sed sequantur. Qui enim reprehendit christianam religionem, et consilio suo vult vivere, quasi præcedere vult Christum; ut ille videlicet erraverit, et invalidus infirmusque fuerit, qui vel voluerit pati inter manus Judæorum , vel potuerit : ille autem cordatus sit cavens ista omnia, declinans mortem , mentiens istam inique ne moriatur, interficiens animam suam ut vivat corpore, magni consilii prudentisque sibi videtur. Præ- cedit reprehendens Christum; veluti antecedit Christum: credat in Christum, et sequatur Christum. Nam quod optatum est modo persecutoribus cogitantibus mala, dixit hoc ipse Dominus Petro. Præcedere quippe quodam loco Petrus voluit Dominum. Loquebatur enim Salvator de passione sua, quam si non suscepisset, nos salvi non essemus ; et Petrus qui paulo ante eum confessus erat Filium Dei, et in illa confessione appellatus erat Petra, supra quam fabricaretur Ecclesia, paulo post Domino dicente de futura passione sua, ait : « Absit, Domine, propitius » esto tibi, non fiet istud. » Paulo ante, « Beatus es, Simon » Bar-Jona, quia non tibi revelavit caro et sanguis, sed » Pater meus qui in cœlis est : » modo repente, « Redi » post me, Satana. » Quid est, « Redi post me? Sequere » me. » Præcedere me vis, consilium mihi dare vis, me-

<sup>1</sup> Psal. cxI, 10.

lius est ut consilium meum sequaris : hoc est , Redi retro, redi post me. Antecedentem compescit, ut retro redeat; et appellat Satanam , quia vult præcedere Dominum. Paulo ante, « Beatus : » modo, « Satana. » Unde paulo ante, « Beatus? Quia non tibi, inquit, revelavit caro et san- » guis , sed Pater meus qui in cœlis est. » Unde modo , « Satana? Quia non sapiis, inquit, quæ Dei sunt , sed » quæ sunt hominum<sup>2</sup>. » Qui ergo volumus recte cele- brare natalitia Martyrum, desideremus imitationem Mar- tyrum; ne velimus præcedere Martyres , et melioris con- silii nobis videri esse, quia evitamus passiones pro justitia et pro fide, quas illi non evitaverunt. Ergo illi qui cogitant mala , et in luxuria nutrunt corda sua, « Avertantur » retrorsum , et erubescant. » Audiant ab Apostolo pos- tea dicente: « Quem autem fructum habuistis aliquando, » in quibus nunc erubescitis<sup>3</sup>? »

V. Quid sequitur? « Avertantur statim erubentes, » qui dicunt mihi : Euge , euge<sup>4</sup>. » Duo sunt genera per-secutorum ; vituperantium , et adulantium. Plus perse- quitur lingua adulatoris, quam manus interfectoris : nam et ipsam caminum dixit Scriptura. Certe cum de persecu- tione loqueretur Scriptura, dixit : « Tanquam aurum in » fornace probavit illos , de Martyribus interfectis, et si- » cut holocausti hostiam accepit illos<sup>5</sup>. » Audi quia et lingua adulantium talis est : « Probatio, inquit, argenti » et auri ignis ; vir autem probatur per os laudantium » eum<sup>5</sup>. » Ignis ille , ignis et iste : de utroque te salvum oportet exire. Fregit te reprehensor , fractus es in fornace tanquam vas fictile. Formavit te verbum , et venit tenta- tio tribulationis : illud quod formatum est, oportet ut coquatur : si bene formatum est , accedit ignis ut firmet.

<sup>1</sup> Matth. xvi, 16-23. — <sup>2</sup> Rom. vi, 12. — <sup>3</sup> Psal. lxix, 4. — <sup>4</sup> Sap. iii, 6.

— <sup>5</sup> Prov. xxvii, 21.

Unde ille dicebat in passione : « Aruit sicut testa virtus mea<sup>1</sup>. » Passio quippe et caminus tribulationis fecerat fortiorum. Rursus si lauderis ab adulantibus et assentantibus, et annueris eis, veluti emens oleum, non tecum portans, sicut quinque virgines insipientes<sup>2</sup>; erit caminus facturæ tuæ etiam os laudantium te. Sed sine his non possumus; necesse est ut et intremus in hæc, et examineamus inde : intremus in vituperationem aliquam malorum et improborum, intremus et in assentationem aliquam adulatorum; sed exire inde opus est. Rogemus eum de quo dictum est : « Custodiat Dominus introitum tuum et exitum tuum<sup>3</sup> : » ut intrans integer, sic exeras integer. Ait enim et Apostolus : « Fidelis est Deus, qui non vos sinat tentari supra quam potestis<sup>4</sup>. » Ecce halæs ingressum. Non dixit : Non tentemini. Qui enim non tentatur, non probatur; et qui non probatur, non proficit. Quid ergo optavit? « Fidelis Deus, qui non vos sinat tentari supra quam potestis. » Audisti ingressum; audi et exitum : « Sed faciet cum temptatione etiam exitum, ut possitis tolerare<sup>5</sup>. Ergo et illi avertantur statim erubescentes, qui dicunt mihi : Euge, euge. » Quare enim me laudant? Laudent Deum. Quis enim ego sum, ut lauder in me? aut quid ego feci? quid habeo quod non accepi? « Si acceperisti, inquit, quid gloriaris quasi non acceperis<sup>6</sup>? » Avertantur ergo statim erubescentes, qui dicunt mihi : Euge, euge. » Tali oleo pingue factum est caput hereticorum<sup>7</sup>, cum dicunt : « Ego sum, ego sum : et dicitur illis : Tu, Domine. » Acceperunt « Euge, euge ; » secuti sunt « Euge, euge : » facti sunt duces cæci cæcorum sequentium<sup>8</sup>. » Apertissimis vocibus Donato dicuntur ista cantata : « Euge, euge, » dux bone, dux præclare. Et

<sup>1</sup> Psal. xxi, 16. — <sup>2</sup> Matth. xxv, 3. — <sup>3</sup> Psal. cxx, 8. — <sup>4</sup> 1 Cor. ix, 3.  
— <sup>5</sup> Ibid. — <sup>6</sup> Id. iv, 7. — <sup>7</sup> Psal. cxl, 5. — <sup>8</sup> Matth. xv, 14.

non dixit ille : « Avertantur statim, et erubescant, qui dicunt mihi : Euge, euge : » nec eos corrigere voluit, ut Christo dicerent : Dux bone, dux præclare. At vero Apostolus reformidans Euge hominum, ut vere laudaretur in Christo, noluit se laudari pro Christo; dicentibus que quibusdam ; « Ego sum Pauli, » respondit in libertate Domini, « Numquid Paulus crucifixus est pro vobis? aut in nomine Pauli baptizati estis<sup>1</sup>? » Ergo dicant Martyres in persecutione etiam adulantium : « Avertantur statim erubescentes, qui dicunt mihi : Euge, euge. »

VI. Et quid fit, cum illi avertuntur, et erubescunt omnes; sive qui querunt animam meam, sive qui cogitant mihi mala, sive qui perversa, et simulata benevolentia, lingua volunt emollire quod feriant; cum fuerint et ipsi aversi et confusi, quid fiet? « Exultent, et jucundentur in te<sup>2</sup> : » non in me, non in illo, aut in illo, sed in quo facti sunt lux qui fuerunt tenebrae. « Exultent, et jucundentur in te, omnes qui querunt te. » Aliud est querere Deum, aliud querere hominem. « Jucundentur qui querunt te. » Non jucundabuntur ergo qui querunt se, quos prior quæsisti antequam quererent te. Non dum quærebat ovis illa pastorem; aberraverat a grege, et descendit ad eam; quæsivit eam, reportavit in humeris suis<sup>3</sup>. Contemnet te, o ovis, querentem se, qui prior quæsivit contemnentem se, et non querentem se? Jam ergo querere eum incipe, qui prior quæsivit te, et reportavit in humeris suis. Fac quod ait : « Quæ sunt oves meæ, vocem meam audiunt, et sequuntur me<sup>4</sup>. » Si ergo queris eum qui prior quæsivit te, et ovis facta es ejus, et audis vocem pastoris tui, et sequeris eum; vide quid tibi de se ostendit, quid de corpore suo, ne in ipso errares, ne in Ecclesia errares, ne quis tibi diceret : Chris-

<sup>1</sup> 1 Cor. i, 12. — <sup>2</sup> Psal. lxix, 5. — <sup>3</sup> Luc. xv, 4. — <sup>4</sup> Joan. x, 3.

tus est, qui non est Christus; aut Ecclesia est, quae non est Ecclesia. Multi enim dixerunt carnem non habuisse Christum, et non in corpore suo resurrexisse Christum: noli sequi voces eorum. Audi vocem ipsius pastoris, qui indutus est carne, ut quæreret perditam carnem. Resurrexit, et ait: « Palpate, et videte, quia spiritus carnem » et ossa non habet, sicut me videtis habere<sup>1</sup>. » Ostendit se tibi; vocem ejus sequere. Ostendit et Ecclesiam, ne quis te fallat nomine Ecclesiae: « Oportebat, inquit, » Christum pati et resurgere a mortuis tertia die, et prædicari in nomine ejus poenitentiam et remissionem peccatorum per omnes gentes, incipientibus ab Jerusalem<sup>2</sup>. » Habes vocem pastoris tui; noli sequi vocem alienorum<sup>3</sup>: et furem non timebis, si vocem pastoris fueris secutus. Unde autem sequeris? Si nec cuiquam hominum dixeris, quasi ejus merito: Euge, euge; nec cum gratulatione audieris, ne oleo peccatoris pinguescat caput tuum<sup>4</sup>. « Exultent, et jucundentur in te, omnes qui quærunt te; » et dicant. » Quid dicant qui exultant? « Semper magnificetur Dominus. » Dicant hoc omnes qui exultant et quærunt te. Quid? « Semper magnificetur Dominus, qui diligunt salutare tuum. » Non tantum « Magnificetur Dominus, » sed etiam « Semper. Ecce errabas, et aversus ab eo eras; vocavit te: « Magnificetur Dominus. » Ecce inspiravit tibi confessionem peccatorum, confessus es, dedit veniam, « Magnificetur Dominus. » Jam cœpisti juste vivere: jam puto quasi justum est ut et tu magnificeris. Etenim cum te vocaret errantem, magnificandus erat Dominus; cum tibi confitenti peccata dimisit, magnificandus erat Dominus: modo jam audiens verba ejus cœpisti proficere, justificatus es, pervenisti ad quamdam virtutis excellentiam; dignum est ut et tu aliquando magnificeris. » Dicant: Sem-

<sup>1</sup> Luc. xxiv, 39. — <sup>2</sup> Ibid. 46. — <sup>3</sup> Joan. x, 5. — <sup>4</sup> Psal. cxl, 5.

» per magnificetur Dominus. » Peccator es, magnificetur ut vocet: confiteris, magnificetur ut ignoscat: jam juste vivis, magnificetur ut regat: perseveras usque in finem, magnificetur ut glorificet. « Semper ergo magnificetur Dominus. » Hoc dicant justi, hoc dicant qui quærunt eum. Quisquis hoc non dicit, non quærerit eum. Ecce, « Magnificetur Dominus. » Exultent, et jucundentur omnes, qui quærunt eum, et dicant: Semper magnificetur Dominus, qui diligunt salutare ejus. » Ab illo est enim illis salus, non a se. Salutare Domini Dei nostri Salvator Dominus noster Jesus Christus: quisquis diligit Salvatorem, confitetur se sanatum; quisquis se confitetur sanatum, fuisse se confitetur ægrotum. « Dicant ergo: Semper magnificetur Dominus, qui diligunt salutare tuum, » non salutare suum, quasi se ipsi salvent; non quasi salutare hominis, tanquam ab illo salventur. « Nolite, inquit, confidere in principes, et in filios hominum, in quibus non est salus<sup>1</sup>. » Quare hoc? « Domini est salus, et super populum tuum benedictio tua<sup>2</sup>. » Ergo, Semper magnificetur Dominus. » Qui hoc dicunt? « Qui diligunt salutare tuum. »

VII. « Ecce magnificetur Dominus: » nunquam tu, nusquam tu? In illo aliquid, in me nihil: si autem in illo quidquid ego; ille, non ego. Tu ergo quid? « Ego vero egenus et pauper sum<sup>3</sup>. » Ille dives, ille abundans, ille nullius indigens. Ecce lumen meum, ecce unde illuminor; quoniam clamo: « Tu illuminabis lucernam meam, Domine; » Deus meus, illuminabis tenebras meas<sup>4</sup>. Dominus solvit compeditos; Dominus erigit elisos; Dominus sapientes facit cæcos; Dominus custodit proselytos<sup>5</sup>. » Quid ergo tu? « Ego vero egenus et pauper. » Ego tanquam pupillus; anima mea tanquam vidua destituta et desolata: auxilium quæro; semper infirmitatem meam confiteor. « Ego vero

<sup>1</sup> Psal. cxlv, 2, 3. — <sup>2</sup> Id. iii, 9. — <sup>3</sup> Id. lxix, 6. — <sup>4</sup> Id. xvii, 29. — <sup>5</sup> Id. cxlv, 7.

» egenus et pauper. » Donata sunt mihi peccata; jam cœpi sequi præcepta Dei: adhuc tamen egenus et pauper. Unde adhuc egenus et pauper? « Quia video aliam legem in » membris meis repugnantem legi mentis meæ<sup>1</sup>. » Unde egenus et pauper? Quia, « Beati qui esuriunt et sitiunt » justitiam<sup>2</sup>. » Adhuc esurio, adhuc sitio: saturitas mea dilata est, non ablata. « Ego vero egenus et pauper; Deus, » adjuva me. » Unde cœpit, « Deus in adjutorium meum » intende: Deus, adjuva me. » Rectissime et Lazarus Adjutus interpretari dicitur: ille egenus et pauper, qui ablatus est in sinum Abrahæ<sup>3</sup>: et gerit typum Ecclesiae Dei, quæ semper confiteri debet adjutorio sibi opus esse. Hoc est verum, hoc est pium. « Dixi Domino: Deus meus es » tu. Quare? Quoniam bonorum meorum non eges<sup>4</sup>. » Ille non eget nostri; nos egemus ipsius: ideo verus Dominus. Nam tu non valde verus dominus servi tui: ambo homines, ambo egentes Deo. Si autem putas egere tui servum tuum, ut des panem; eges et tu servi tui, ut adjuvet labores tuos. Uterque vestrum altero vestrum indiget. Itaque nullus vestrum vere dominus, et nullus vestrum vere servus. Audi verum Dominum, cuius verus es servus: « Dixi Domino: Deus meus es tu. Quare tu Domini minus? Quoniam bonorum meorum non eges. » Quid autem tu? « Ego vero egenus et pauper. » Ecce egenus et pauper: » pascat Deus, sublevet Deus, adjuvet Deus: » Deus, inquit, adjuva me. »

VIII. « Adjutor et erutor meus es tu, Domine; ne tardaveris. » Tu adjutor et erutor: indigo auxilio, adjuva; implicatus sum, erue. Nemo enim eruet de implicationibus, nisi tu. Circumstant nos nexus diversarum curarum; hinc atque inde dilaniatur quasi spinis et sepibus, amulamus angustam viam; fortasse haesimus in sepibus: dicamus

<sup>1</sup> Rom. vii, 23. — <sup>2</sup> Matth. v, 6. — <sup>3</sup> Luc. xvi, 22. — <sup>4</sup> Psal. xv, 2.

Deo: « Tu es erutor meus. » Qui ostendit angustam viam<sup>1</sup>, fecit ut sequeremur. Haec vox perseveret in nobis, fratres. Quantumcumque hic vixerimus, quantumcumque hic profecerimus, nemo dicat: Sufficit mihi, justus sum. Qui dixerit, remansit in via, non novit pervenire. Ubi dixerit, Sufficit, ibi haesit. Attende Apostolum, cui non sufficit; vide quomodo se vult adjuvari, donec perveniat: « Fratres, inquit, ego me non arbitror apprehendisse<sup>2</sup>: » ne illi sibi viderentur apprehendisse, quibus rursus dicit: « Qui se putat aliquid scire, nondum scit quemadmodum oportet scire<sup>3</sup>. » Quid ergo ait? « Fratres, ego me non arbitror apprehendisse. » Supra dixerat, « Non quia jam accepimus, aut jam perfectus sim: » et ibi sequitur, « Fratres, ego me non arbitror apprehendisse<sup>4</sup>. » Si nondum accepit, egenus et pauper est: si nondum perfectus est, egenus et pauper est. Bene dicit, « Deus, adjuva me. » Sed intelligit aliquid, et excelsius intelligit. Vide tamen quid dicit: « Ei autem qui potest super omnia facere superabundantius quam petimus et intelligimus<sup>5</sup>. » Vide ergo quia nondum pervenit, nondum apprehendit. Quid ergo ait? « Fratres, ego me non arbitror apprehendisse: unum autem, quæ retro oblitus, in ea quæ ante sunt extensus, secundum intentionem sequor ad palmam supernæ vocationis<sup>6</sup>. » Ille ergo currit, tu haesisti. Ille dicit nondum se perfectum, et tu jam de perfectione gloriaris! Confundantur qui tibi dicunt: Euge, euge. Confundaris inter illos et tu, quia tu tibi dicis: « Euge, euge. » Qui enim se ipsum laudat, sibi dicit: « Euge, euge: » qui ab aliis laudatur et consentit, non portat oleum secum: deficit facies, clausurus est ille januam<sup>7</sup>.

IX. Hoc ergo nos docuit Psalmus iste breviter, charis-

<sup>1</sup> Matth. vii, 14. — <sup>2</sup> Philip. iii, 31. — <sup>3</sup> 1 Cor. viii, 2. — <sup>4</sup> Philip. iii, 12, 13. — <sup>5</sup> Ephes. iii, 20. — <sup>6</sup> Philip. iii, 13, 14. — <sup>7</sup> Matth. xxv, 3.

simi , ex admonitione solemnitatis Martyrum , ut intelligamus quia Martyres tribulationem hic passi sunt corporalem ; nos in quantacumque pace simus , necesse est patiamur tribulationem spiritalem<sup>1</sup> : et necesse est ut inter scandala , et zizania , et paleam gemat Ecclesia et illa massa , donec messis veniat , donec ventilabrum , donec veniat ultima ventilatio , ut separetur palea a frumento , donec ad horreum redigatur<sup>2</sup>. Quod donec fiat , clamemus : « Ego vero egenus et pauper sum ; Deus , adjuva me : ad » jutor meus es tu , Domine ; ne tardaveris. Quid est , « Ne » tardaveris? » Quia multi dicunt : Longum est ut veniat Christus. Quid ergo , quia dicimus , « Ne tardaveris , » venturus est antequam statuit venire ? Quid sibi vult hoc votum : « Ne tardaveris? » Ne mihi tardius videatur quod venturus es. Tibi enim longum videtur ; non Deo longum videtur , cui mille anni dies unus est , vel tres horae vigiliae<sup>3</sup>. Sed tu si non habueris tolerantiam , tardum tibi erit : et cum tibi tardum erit , deflecteris ab eo , et eris similis illis , qui in eremo fatigati sunt , et festinaverunt a Deo petere delicias , quas illis in patria reservabat ; et cum non darentur deliciae in itinere , quibus forte corrumperentur , murmuraverunt adversus Deum , et redierunt corde in Aegyptum<sup>4</sup> ; unde corpore fuerant separati , corde redierunt. Noli ergo tu sic , noli sic : time verbum Domini dicens : « Mementote uxoris Lot<sup>5</sup>. » Et ipsa in via , jam liberata de Sodomis , retro respexit ; ubi respexit , ibi remansit : facta est statua salis<sup>6</sup> ut condat te. Exemplo enim tibi data est , ut tu cor habeas , non remaneas fatuus in via. Attende remanentem , et transi : attende respicientem retro , et tu in anteriora extensus esto , sicut Paulus. Quid est non respicere retro<sup>7</sup>? Quae retro oblitus , inquit. Ideo sequeris

<sup>1</sup> Matth. xii, 30. — <sup>2</sup> Id. iii, 12. — <sup>3</sup> Psal. LXXXIX, 4. — <sup>4</sup> Exod. xvi, 2, et Act. vii, 39. — <sup>5</sup> Luc. xvii, 32. — <sup>6</sup> Gen. xix, 29. — <sup>7</sup> Philp. m, 13.

vocatus ad supernam palmam , de qua postea glorieris. Quia idem Apostolus dicit : « Superest mihi corona justitiae , quam mihi reddet Dominus in illo die justus Judex<sup>1</sup>. »

---

## ENARRATIO I

### IN PSALMUM LXX.

#### SERMO I.

De prima parte Psalmi.

I. In omnibus Scripturis sanctis , gratia Dei quæ liberat nos commendat se nobis , ut commendatos habeat nos. Hoc in isto Psalmo canitur , de que cum Vesta Charitate loqui suscepimus. Aderit Dominus , ut sic eam corde concipiam , quomodo dignum est ; et sic eam promam , quomodo expedit vobis. Multum enim movet Dei amor et timor : timor Dei , quia justus est ; amor , quia misericors est. « Quis enim ei diceret : Quid fecisti<sup>2</sup> : » si damnaret inustum? Quanta ergo misericordia ejus , ut justificet inustum? Ex hoc prælectum nobis et Apostolum audiimus eamdem maxime gratiam commendantem : de cuius commendatione habebat Judæos inimicos , velut de Legis littera præsumentes , et tanquam justitiam suam diligentes atque jactantes ; de quibus dicit : « Testimonium perhibeo illis , quia zelum Dei habent , sed non secundum scientiam. » Et tanquam ei diceretur , « Quid est enim habere zelum Dei non secundum scientiam? » subjicit continuo , « Ignorantes enim Dei justitiam , et suam voluntates constituere , justitiae Dei non sunt subjecti<sup>3</sup>. »

<sup>1</sup> 2 Tim. iv, 8. — <sup>2</sup> Sap. xii, 12. — <sup>3</sup> Rom. x, 2, 3.